

Rapport dalla radunonza da vischnaunca dils 05-12-2022

Tractanda 1 **Avertura ed elecziun da 2 dumbravuschs**

Sco dumbravuschs vegnan Marcus Schmed e Rafael Guldemann elegi.

Tractanda 2 **Approbaziun dil protocol dalla radunonza communal dils 01-12-2021**

Il president communal Dumeni Tomaschett declara ch'il protocol seigi staus a disposiziun tier l'administraziun communal per investa. Cun quei che negin giavischa la prelecziun dil protocol sa vegnir passau tier la votaziun d'approbaziun.

Il protocol dalla radunonza communal dils 01-12-2021 vegn approbaus en votaziun unanima cun engraziament.

Tractanda 3 **Orientaziun davart igl agir vinavon cun la Casa Carigiet entras il president ed igl architect da Trun Cultura, pusseivladad da tschentar damondas**

Il president da Trun Cultura, Armin Niederberger, ed igl architect e scenograf Remo Derungs informeschan davart las novitads en caussa Casa Carigiet.

La suprastanza da Trun Cultura ha decidu da realisar la reconstrucziun dalla Casa Carigiet en etappas. L'entschatta digl onn 2023 vegn la ruina rumida cun l'intenziun d'allontanar il palancau ed il tetg provisorii. En in pass intermediar vegn construuiu in tetg plat e la Casa Carigiet duei vegnir accessibla parzialmein per la publicitad gia naven dalla stad 2023.

Silsuenter vegn l'uniun Trun Cultura a luvrar vid la realisaziun digl object final en sia fuorma oriunda cun il nez d'ina casa da cultura. Finamira ei che las lavurs vid il baghetg ein terminadas igl onn 2026.

Tractanda 4 **Approbaziun dall'ordinaziun da funs**

Il cudisch funsil Cadi ha entschiet igl onn 2019 cun las lavurs per l'introducziun dil register funsil federal sigl intschess da nossa vischnaunca. Per che buca mintga singul dretg che vegn basignaus per la cultivaziun da terren stoppi vegnir impurtaus el cudisch funsil, ha la suprastanza communal decidu sin cussegl dallas persunas dil fatg da relaschar ina ordinaziun da funs. En quella ordinaziun vegn resumadamein stipulau suandont: Maunca ad in bein immobilial la via necessaria per la cultivaziun agricola sco colligiaziun tier ina via publica ni tier ina via da funs, vala per quei bein il dretg da transitar e da carrar ils beins immobiliars vischinonts per la cultivaziun agricola.

La radunonza communal approbescha l'ordinaziun da funs cun 53 : 0 vuschs.

Tractanda 5 **Preventiv per igl onn 2023**

Il president communal informescha ch'il cussegl da vischnaunca hagi tractau il preventiv 2023 e proponi unanimamein l'approbaziun da tal.

Il preventiv dil quen da gudogn e sperdita 2023 siara cun in surpli d'entradas da frs. 2'749'000.-. Il gudogn avon amortisaziuns munta à frs. 3'225'800.-. Il quen d'investiziuns preveda investiziuns nettas da frs. 2'929'000.-. Cun quellas aultas investiziuns resta alla vischnaunca in surpli da finanziaziun da frs. 296'800.-.

Las posiziuns principalas secumponan ord:

3290.5290.00	Fiasta 600 onns Ligia Grischa	frs.	150'000.00
3290.5660.00	Contribuziun restauraziun fatschada Cuort Ligia Grischa	frs.	120'000.00
6150.5010.05	Via Campliun – Caltgadira	frs.	1'270'000.00
6150.5010.06	Via Pustget	frs.	415'000.00
6150.5010.90	Sanaziun illuminaziun publica (project viafier)	frs.	150'000.00
6190.5060.00	Maschina communal	frs.	240'000.00
7301.5030.00	Sanaziun deponias da rumians	frs.	100'000.00
8205.5010.04	Via Nadels – Rost	frs.	1'000'000.00

Suenter quellas explicaziuns surdat il president il plaid alla canzlista communal per informaziuns detagliadas davart il preventiv 2023. Sandra Gautschi presenta las diversas spartas dil preventiv cun dar las explicaziuns necessarias.

Ils presents approbeschan en votaziun unanima il preventiv dil quen da gudogn e sperdita ed il preventiv dil quen d'investiziun pigl onn 2023.

Tractanda 6 **Fixaziun dil pei da taglia pigl onn 2023**

Dapi igl onn 2012 ha la vischnaunca da Trun in pei da taglia da 105 pertschien. Il president communal informescha che la suprastanza communal, la cumissiun da gestiun ed il cussegl da vischnaunca proponien alla radunonza communal da sbassar il pei da taglia per igl onn 2023 sin 95% dalla taglia cantunala sempl.

La fiera d'energia ei actualmein fetg favoreivla per la vischnaunca da Trun che posseda 2.625 pertschien dallas aczias dallas ovras electricas Reinanteriur (ORA). Fertion che la vischnaunca profitescha da varga 3 milliuns dapli entradas, pagan ils privats entuorn 30% dapli per l'energia. Las instanzas vulan dar anavos zatgei al pievel ed ein dil meini ch'in sbassament dil pei da taglia per 10% seigi indicaus.

Ils presents fixeschan en votaziun unanima il pei da taglia per igl onn 2023 sin 95% dalla taglia cantunala sempl.

Tractanda 7 **Varia**

Sut varia informescha il president communal davart entginas actualitads.

Per la suprazionza communal

Il president

Dumeni Tomaschett

La actura

Sandra Gautschi